

Ngu jo cjua xi chja
xujun changá tsëhë Nina VII

Historias del Antiguo Testamento VII

Jueces - 1 Samuel 16:13



en el mazateco de Chiquihuitlán de Juárez.

**Ngu jo cjuá xi chja
xujun changá tséhě Nina VII**

Historias del Antiguo Testamento VII

Jueces - 1 Samuel 16:13



Las ilustraciones son propiedad de la Fundación David C. Cook, usadas con permiso.

Primera edición
Historias del Antiguo Testamento VII
en el mazateco de Chiquihuitlán de Juárez
México, D. F. .6C
Enero de 1994

Historias del Antiguo Testamento VII

Cavetsihin vihndiin xuta tjë rë Israel tsëhë Nina

(Jueces 1:1-3:6)

Hya xi camá ne, hya xi tu cahme Josué hane hacuaha cahme yahnga xuta xi cavëë me cojo tuxcun me hacutjin xi jemu cavisecoo Nina xuta xi cama cafahataha me nangui ladu rë Canaán ne, quihndi rë me xi suva canuhya rë tsëhë ne, cavetsihin cahndiin me tsëhë ley rë Nina. Nixtin hya ne, cjëë cjuahataha me yëjë ciuda hiscan siu xuta cananeo, hacuaha cjëë tsiquehen me xuta jan. Hacuaha hisca caviyijiin sa me cjuatacun rë me xi cjuahataha me yëjë sa ciuda ta, cavetsihin cavisiajmindaja me cojo xuta jan. Hacuaha cafaha me tujún rë xuta jan cojo sa xi tsajin me suaxti rë me. Cuatjin camá xi yahnga xuta cananeo ne, siucuaha me nangui xi hmi rë Israel. Hya xi camá ne, xuta tjë rë Israel ne, cavetsihin me cafaharcun me nina ndacha xi faharcun xuta cananeo, hacuaha cavetsihin cavixan me cojo xuta xi cuacun vë.

Ngajan xi Nina ne, cavetsihin camacjan rë me cojo xuta tjë rë Israel tsëhë xi ha quihndë cavetaharcuaain me compromisu xi casahmi me cojo Nina. Cavitexa Nina me xi tsiquehen me xuta xi cuacun vë, hacuiin xi cuixan me cojo rë me, hacuiin xi cuisiajmindaja me cojo rë me. Hacuaha cavitexa Nina xi cjuaharcuaain xuta nina ndacha rë xuta cananeo. Hane xi camacjan



rë Nina ne, catsingatju me cjua cojo ngu ángel xi ha quihndë cuisecuaain Nina xuta tjë rë Israel xi cuaxë me xuta cananeo xi siucuaaha sa tsëhë ngajan. Ángel jan ne, cachja cojo rë me xi Nina cuisecoo me xuta cananeo jan cojo sá xi cuma tsejen sá xi cuya cuihndë xuta tjë rë Israel tsëhë Nina o sá xi cuihndiin me. Xi cuetsihin nixtin hya cojo nixtin xi cjuiniji sa ne, xuta cananeo cuma condra xu rë xuta tjë rë Israel. Hya xi canuhya rë xuta tjë rë Israel cjua vëhë ne, jemu choho camá rë me. Catsiquehen me ngujo chu xi sua me cjuatjo cojo Nina.

Xuta tjë rë Israel jan ne, caviyuju tangun me nangui israel cojo xuta cananeo xi ha siu nangui ladu vëhë hisca nixtin titjun. Hane ngatsë rë xi quiji nduju xi siu tangun me, vëhë camá xi cafaharcun me nina ndacha rë xuta cananeo hacuaha cavixan me cojo xuta xi cuacun jan. Ngajan xi camá cavatju cjuacjintacun xi cachja Nina. Nina casahmi me xi xuta condra rë xuta tjë rë Israel ne, casahmi rë me ganar xcun si xi casahmi me, hacuaha jemu choho casahmi xuta jan cojo xuta tjë rë Israel. Hya xi camá ne, tsëhë xi ha jemu jyë cjuañihi tivatju xuta tjë rë Israel ne, vëhë xi casahmi me oración rë me cojo Nina. Cafehya me favor xi cuisecoo Nina me. Ngajan xi

Nina ne, cavaxijin me xuta juez xi cuisecoo rē me cuitexa me me.
 Hya xi camá ne, jinguyējē rē xi siucuaha cjuahñu jimangu xuta juece
 jan ne, cafaharcun nga xuta Nina, peru hya xi cahme me ne, cavuya
 cafaharcun nga xuta nina ndacha. Xcusun vėhė ne, hatuxa jemu cjin
 nu cuatjin camá xcusun rē me.

Casahmi Nina xi juez cuitexa rē xuta tjė rē Israel

(Jueces 3:7-5:31)

Xuta xi siu ngajan nandya Mesopotamia ne, tjun cacaa rē me xi
 cama casahmi me ganar ngu si cojo xuta nangui Israel. Nina casua
 cahndė xi casahmi xuta xi cuacun vėhė ganar si xi casahmi me, ta
 tsėhė xi xuta tjė rē Israel ne, tifaharcun me nina ndacha. Hane tsėhė
 xi casahmi ganar me si, me xi matitjun tsėhė nandya Mesopotamia
 ne, me vėhė cavitexa me nandya nangui Israel cahntsua xi jyin nu.
 Hane xi choho ma rē xuta tjė rē Israel ne, casahmi me oraci3n rē me
 cojo Nina xi cjuaquixi. Sehe cavaxijin me Otoniel, ngu me xi
 quihndinchuhme rē Caleb, cojo sa xi cuaxėtje me xuta tjė rē Israel.
 Hya xi camá ne, Nina cavisecoo rē Otoniel cojo sindadu rē me xi
 cafaha xicjin me cojo me xi matitjun jan. Hane casahmi me ganar si

xi casahmi me cojo xuta nandya jan. Hane xi cavatju vëhë ne, Otoniel camá me juez tsëhë xuta nandya Israel, hane me vëhë cavitexa me xuta tjë rë Israel cahntsua yachan nu.

Peru hya xi cahme Otoniel ne, xuta tjë rë Israel jan ne, cavuya cahndiin nga me tsëhë Nina. Nixtin hya ne, Nina casahmi me xi xuta tjë rë Israel ne, cacaain rë me cojo si xi casahmi me xi matitjun tsëhë nandya Moab cojo rë me. Hane me xi matitjun tsëhë Moab ne, camatitjun me tsëhë yëjë xuta nangui Israel cahntsua tyjuhun jyan nu. Ngajan xi xuta tjë rë Israel jan ne, ngu ndiya xatsë cafehya nga me favor cojo Nina xi cuisecoo rë me. Hane Nina ne, cavitexa me ngu me xi hmi rë Aod xi tsiquehen me me xi matitjun jan hacuaha cuisecoo me xuta tjë rë Israel xi sahmi me ganar xcun si xi camá cojo xuta nandya jan. Hane xi cavatju si vëhë ne, Aod cavitexa me xuta tjë rë Israel cahntsua ñujuchan nu hane hya cavisehen cjuandaja cjuajeya ngajñi rë me.

Ngu nga cha xi hacuaha cavisecoo rë xuta tjë rë Israel nixtin hya ne, hacui cha Samgar. Cha vëhë catsiquehen cha jyun cientu xuta filisteo cojo ya xi tsitëë cha chu.

Hane xi cavatju cahme cha Aod jan ne, xuta tjë rë Israel ne, cavuya cahndiin nga me tsëhë Nina. Nixtin hya ne, casua Nina cahndë xi xuta xi matitjun tsëhë xuta nandya Canaán ne, casahmi me si cojo rë me hisca xi cacaain rë me, hane xuta nandya Canaán ne, cavitexa me xuta tjë rë Israel. Me xi má capitán rë sindadu ngajan nandya Canaán nixtin hya ne, Sísara hmi rë me. Me vëhë ne, jercu choho casahmi me cojo xuta tjë rë Israel cahntsua can nu. Hya xi camá ne, xuta tjë rë Israel jan ne, casahmi me oración rë me hane cafehya me favor cojo Nina xi cuisecoo rë me ngu ndiya nga. Juez xi cavitexa rë xuta tsëhë nangui Israel nixtin hya ne, ngu na xi hmi rë Débora. Hya xi camá ne, Nina cavitexa me na xi quiji cachja na cojo ngu cha xi hmi rë Barac xi sahmi tangun cha sindadu sehe cjue sahmi cha si cojo sindadu rë Sísara. Hacuaha cachja sa na cojo cha xi Nina ne, hatuxa cuisecoo me cha xi scaa rë cha sahmi cha ganar tsëhë si xi sahmi cha cojo yëjë sindadu rë Sísara jan. Peru tsëhë xi tsacjun cha Barac sahmi cha si sacuatjin cachja na Débora cojo rë cha ne, cachja cha cojo rë na ta, cjue cha sahmi cha si peru cojo ngu cjuatacun xi cjue na cojo rë cha. Hane na vëhë ne, cachja na xi cuma cjue na; peru hacuaha cavetahacoo sa na cachja na cojo cha xi tsëhë xi tsacjun cha vëhë cjue cha ne, vëhë xi cjue na peru Nina sua



me na cahndë xi ngu chjuun
ne, cuma tsiquehen na Sísara,
cahndë rë xi sua me cahndë
xi cha Barac cjue cha
tsiquehen cha cha. Cuatjin
camá xi quiji cha Barac peru
cojo na Débora.

Casahmitangun me ngujo
sindadu rë xuta tjë rë Israel
ne, sehe quiji casahmi me si
cojo sindadu rë xuta cananeo.
Cacaa rë me cojo si jan, peru
Sísara ne, cama cavaxëtje me
yojo rë me.

Sísara jan ne, quiji cavangahma me cahntsua ndihya tsjian rë
ngu xuta cananeo, ta tsëhë xi cha vëhë ne, hatuxa cuatjin matangun
cha cojo xuta cananeo. (Xuta cananeo ne, hacuaha matangun me
cojo xuta tjë rë Israel ta nduva tjë rë me cojo Moisés ngatsë rë

chjuun rē Moisés. Vēhē xi cha cananeo jan ne, cavetjuxin cha tsēhē xuta rē cha, hane quiji cavejña cha ladu rē xuta tjē rē Israel.) Cha cananeo jan ne, tsajin xtin cha xi cafehe Sísara ndava cha ta, suva ni na Jael chjuun rē cha tacun na. Hane na vēhē cachja na cojo cha Sísara xi ngajan visehen cha. Casua na hitsē lechi cahvi cha ne, sehe caveyahma na cha sacuaaha xi tivisecoo na cha, peru quixiin ta xi cjuaquixi ne, xuta tjē rē Israel tivisecoo na. Hane hora xi ha cafañafē Sísara ne, sehe catsiquehen na cha cavēhē na ngu yuyuju rcu cha. Hane sehe tu hitsē hora cavatju xi catsiquehen na cha ne, sehe cafehe cha Barac vanguise cha Sísara. Hane chjuun jan ne, catsingacun na Sísara xi jiña cha cahme cha. Nixtin hya jercu catsiquehen xuta tjē rē Israel xuta cananeo. Sehe na Débora cojo cha Barac ne, catsindaja me ngu canción xi chja hacutjin xi jemu cavisecoo Nina me. Xi cavatju vēhē ne, yējē xuta tjē rē Israel ne, cavisehen cjuandaja cjuajeya ngajñi rē me cahntsua yachan nu.

Vaxëtje Gedeón xuta tjë rë Israel tsëhë xuta madianita

(Jueces 6:1-8.2)

Hya xi camá ne, xi cavatju cahme na Débora ne, xuta tjë rë Israel ne, cavuya cahndiin me tsëhë Nina ngu ndiya nga. Ngajan xi Nina ne, cavisecoo me xuta madianita, hane casahmi me ganar si xi casahmi me cojo xuta tjë rë Israel. Hane me xi cuacun vë ne, casahmi me gobiernu xuta tjë rë Israel cahntsua yatu nu. Hacuaha xuta madianita jan cojo xuta amalecita cojo jingu sa xuta tahndee rë caffè cavatëxni me yëjë xitjë rë xuta tjë rë Israel catsijehnduya me. Xi matsejen ne, xuta israelita ne, tsajin camaha ni mé xi sinë me.

Ngajan xi xuta tjë rë Israel jan ne, casahmi me oración rë me cafehya me favor cojo Nina xi cuisecoo rë me. Hane Nina ne, catsinguitsjen rë me ta, tsëhë xi cahndiin me tsëhë Nina hisca cafaharcun me nina ndacha, ngatsë rë vëhë tijima xi cuatjin tivatju me cjuañihi.

Ngajan xi Nina ne, catsingatju me ngu ángel quiiji cachja cojo ngu xihin xi hmi rë Gedeón xi cjue sahmi me si cojo sindadu rë xuta madianita. Hacuaha cavitexa rë me xihin jan xi tsinguetsun



ngasunscun xi catsindaja nahmi rë me xi sahmixa xi tsiquehen me chu xi sua me cjuatjo cojo nina ndacha xi hmi rë Baal. Hane xi camá catsinguetsun me ngasunscun jan, cahndë rë vëhë ne, catsitsindaja me ngu nga ngasunscun xi tsëhë Nina xi cjuaquixi. Sehe meje rë xi tsiquehen me ngu ndyaja xi cuma ngu cjuatjo xi tjinchihin sua me cojo Nina. Cuatjin cavitexa Nina Gedeón. Hane Gedeón ne, meje cuihndë me tsëhë Nina peru tsacjun me xuta rë nahmi rë me cojo sa xuta nangui rë me, vëhë xi hya xi casahmi me sacuatjin cachja Nina cojo rë me ne, nguixun casahmi me. Hya xi cama nchujun jan ne, xi cavëë xuta mé xcusun xi casahmi Gedeón jan ne, meje tsiquehen xuta me. Peru ngajan xi nahmi rë Gedeón ne, cachja me cojo xuta jan ta sa Baal jan ne, nina jain, tsajin mé xi mameje rë xi sahmixa xuta jan, ta má vaxëtje suva me yojo rë. Cuatjin cachja nahmi rë Gedeón, hane vëhë xi camá cavetjutje Gedeón.

Hya xi camá ne, sindadu madianita cojo sindadu amalecita cojo jingu sa sindadu ne, camatangun me yějě me cojo sa xi jercu xutacjin camá me xi caviyuju ngajan nangui rě xuta nangui Israel. Hya xi camá ne, Nina ne, cavisecoo me Gedeón hane hacuaha camá casahmi tangun me sindadu cjin. Ngajan xi Nina ne, cachja me cojo Gedeón ta sindadu rě me jan ne, jemu cavatjutaha cha tsěhě cha xi mameje rě tsěhě si. Cuatjin camá xi catsingatju me yějě sindadu xi tsacjun cha xi cuya cha ndava cha. Peru handasa cuatjin camachuva me xi siucuaha ne, cjin má me. Hya xi camá ne, sehe quiji cojo me sindadu xi siucuaha hiscan vetju nandá, sehe cachja me cojo cha xi cuihi cha nandá. Ngajan tsejen xi jyan cientu vasen ni sindadu jan



cojo tsja ni cha cafaha cha nandá cahvi cha; hane cha xi yahnga ne, quiji cha cavixcunhnchi cha hiscan vetju nandá jan cahvi cha.

Ngajan xi Nina ne, cachja me cojo Gedeón xi cha xi cavixcunhnchi xi cahvi nandá jan ne, catitsingatju me cha catje cha ndava cha, hane cha xi jyan cientu ni jan ne, cha vëhë ni sindadu xi cjuecojo me.

Hane Gedeón ne, cuatjin cavaxijin me sindadu xi cjuecojo me.

Nguixun hya ne, cavatjécja Gedeón sindadu rë me xi jyan cahndë má me. Sehe casua Gedeón jima ngu sindadu rë me jan ngu ngu tyjó cojo ngu ngu ndihi xi yaha rë ngu tilu. Sehe quijicojo me ngu cahndë rë sindadu jan xi má ngu cientu me hisca cafehe me tjehe cahndë rë ndihya tsjian rë xuta xi má condra rë me jan. Hane xi catsijane Gedeón tyjó rë me ne, hacuaha catsijane sindadu jan tyjó rë cha. Hacuaha ngajan cavacjan cha tilu xi yaha rë ndihi jan cojo sa xi cumatsejen ndaja sa rë cha. Hane ngu xta ni cajindaya yëjë sindadu cachja cha cuitjin:

—¡Nina cojo Gedeón! —Cuatjin cajindaya cha cachja cha.
Hacuaha cuatjin casahmi sa jo cahndë sindadu xi yahnga.



Hora hya ne, jo sa cahndë cha sindadu rë xuta tjë rë Israel jan ne, viyuju cuaha ni cha. Jinguyëjë rë xi siu me ngajan ne, cha sindadu condra rë me ngatsë rë chircun rë cha tsëhë xi hviin cha mé xi tijima, tu ngajñi rë cha cavetsihin cacjan cha. Hya xi camá ne,

quiji cavatju yějē cha condra rē jan cavanga cha. Ngajan xi ngu nga cahndē sindadu rē xuta tjē rē Israel, canduvatjengui cha sindadu condra jan cavangacojo cha cha. Hacuaha jinguyējē rē xi tivangacojo cha cha, yahnga sindadu tjē rē Israel ne, siutaha cuidadu me yějē cahndē hiscan xi cuma cuatjucja condra rē me ndajyē Jordán. Cuatjin camá xi jemu cjín sindadu rē xuta madianita cahme cha, hacuaha cojo sa jo me xi matitjun tsēhē cha cahme me. Hane Gedeón cojo yějē xi jyan cientu sindadu rē me ne, cavatjucja me ndajyē Jordán, hane ngajan ngunda ne, casacu sa rē me jo sa me xi matitjun tsēhē xuta madianiŋa, hane hacuaha catsiquehen me me.

Casuaxa sa Nina xuta xi cuitexa rē xuta tjē rē Israel

(Jueces 8:30-12:15)

Gedeón jan ne, jyanchantē má quihndi rē me xi casacu rē me cojo yějē chjuun rē me xi cavixan me cojo; hane ngu sa cha xi hmi rē Abimelec casacu rē me cojo chjuun rē me xi hacuiin cavixan me cojo. Hya xi cavatju sa nixtin hacuaha cahme Gedeón ne, xuta tjē rē Israel jan ne, cavuya cafaharcun nga me nina ndacha. Hane cha Abimelec jan ne, quiji cha ngajan nandya Siquem, nandya hiscan

tacun naa rē cha, hane camá xi meje rē cha cojo xuta jan ta xuta vĕhĕ casuaxa me cha xi cumatitjun cha tsĕhĕ xuta ciuda vĕhĕ. Hya xi camá ne, casahmitangun cha yĕjĕ me xi meje tangun cojo cha, sehe quiji catsiquehen cha jyanchan tĕ hntsĕjĵnu cha jan. Ngu tutu ni cha xi hmi rē Jotam cavetjutje cha, tsĕhĕ xi cha vĕhĕ ne, caseyahma cha hora hya. Sehe cha Jotam jan ne, quiji casecuntiña cha tsĕhĕ nandya Siquem jan, sehe cajindayataha cha xuta nandya jan tsĕhĕ ngajan ni hisca xi secun cha. Hane cachja cha hora xi cajindaya cha tsĕhĕ me ta xuta xi cuacun jan ne, hya xi meje rē xi ndaja sahmi me ne, jemu choho camaha ni casahmi me cojo nima nahmi rē me cojo quihndi rē me. Vĕhĕ cuma xi tangun ni Abimelec cojo xuta rē me ne, cuechu nixtin xi cuechji me tsĕhĕ xcusun xi casahmi me. Cuatjin cachja me. Hya xi cavatju jyan nu xi sahmi gobiernu Abimelec ne, Nina casahmi me xi cha Abimelec cojo xuta nandya Siquem jan ne, chohovĕĕ me xicjin me hane cacjan me ngajĵni rē me. Hya xi camá ne, Abimelec cojo xuta ladu rē me ne, caca rē me catsiquehen me xuta nandya Siquem jan. Cavaca me ngu ndihya hnga hane cafĕ xuta xi siu jan cati me. Hya xi camá ne, quiji Abimelec casahmi me si cojo xuta tsĕhĕ jingu sa nandya ne, peru

ngajan ne, ngu chjuun rë nandya vëhë ne, cavetaha na ngu ndyojo natsi rcu Abimelec, hane sehe catsiquehen me ngu me xicjin me.

Hya xi cavatju cahme Abimelec ne, Tola camá me juez cahntsua can jyan nu; hane xi cahme me vëhë ne, Jair camá me juez cahntsua can jo nu.

Hya xi camá cavatju nu jan ne, xuta filisteo cojo xuta amonita ne, cavaxëtje me yojo rë me tsëhë si, sehe cavitexa me xuta israelita hacuaha choho casahmi me cojo cahntsua tyjuhun jyan nu. Nina casua me cahndë xi cuatjin cuatju xuta tjë rë Israel sacuaha castigu tsëhë xi cavuya cafaharcun nga me nina ndacha. Nixtin hya xi casahmi xuta xi cuacun oración rë me cojo Nina ne, ta cafehya rë me favor xi cuisecoo rë me Nina. Nina ne, cachja me cojo rë me ta catjehya rë me nina ndacha xi faharcun me, cojo sa xi vëhë cataxëtje rë me sa xi cuma sahmi. Cuatjin cachja me. Cuatjin camá xi xuta tjë rë Israel ne, ha quihndë cafaharcuaain me nina ndacha, sehe ngajan xi Nina xi cjuaquixi jain ne, cavuya cavisecoo rë me ngu xatsë nga.

Nixtin hya cavejña ngu cha xi hmi rë Jefté, ngu cha sindadu xi hacuaha jemu ndaja sahmi si. Hane hntsějñu Jefté xi hacuiin tangun naa rë me cojo ne, chuyiin rë me tsëhë Jefté, tsëhë xi quihndi rë ngu chujuun tujyë me. Peru hya xi cavetsihin xuta amonita casahmi me si cojo xuta xi siu nangui Israel jan ne, hntsějñu Jefté jan ne, quiji cafehya me favor cojo Jefté xi me vëhë cumatitjun me tsëhë sindadu rë xuta tjë rë Israel. Hisca casua xuta jan cjua rë me cojo Jefté xi me vëhë cuma me juez rë xuta jan sa xi sahmi me ganar si xi sahmi me jan. Hane Jefté ne, johu, chja me. Sehe Jefté ne, catsingatju me cjua cojo me xi matitjun tsëhë xuta amonita, vinenguise me, ¿mé má cuatjin sahmi me si cojo xuta tjë rë Israel? Hane xi catsicuya xuta xi cuacun jan cjua ne, chja me ta, cuatjin sahmi me si ta tsëhë xi xuta tjë rë Israel ne, cafahataha me yëjë nangui rë xuta xi cuacun jan hatsëë nu. Hane Jefté ne, catsicuya nga me cjua ta hacuiin cuatjin camá ta hacuiin tu cafaha ni me nangui rë xuta amonita. Peru me xi matitjun tsëhë xuta amonita jan ne, miji cuijnercu me cjua xi chja Jefté. Ngajan xi Nina ne, cavisecoo me Jefté xi casahmi me si cojo xuta xi cuacun jan, hane cacaa rë me catsicjë me xuta xi cuacun jan.

Hya xi camá ne, xuta ladu ndihya tjë rë Efraín ne, jemu cjan rë me ta tsëhë xi cachjaain Jefté cojo rë me xi cojo me cumá me sindadu hora hya. Cuatjin camá xi xuta tjë rë Manasés xi hacuaha xuta rë Jefté jan hane xuta tjë rë Efraín cacjan me cojo xicjin me. Hane jemu cjín xuta tjë rë Efraín cahme me. Hane Jefté jan ne, me vëhë camá me juez tsëhë xuta tjë rë Israel cahntsua jyun nu.

Hane xi cavatju cahme Jefté ne, Ibzán camá me juez tsëhë xuta tjë rë Israel, hane cavitexa me ngajan nangui Israel cahntsua yatu nu. Hane xi cahme me vëhë ne, Elón sehe camá me juez tsëhë xuta tjë rë Israel cahntsua të nu. Hane xi cahme me vëhë ne, Abdón cavitexa me xuta nangui vëhë cahntsua jyin nu.

Sansón cavaxëtje me xuta tjë rë Israel xcun si xi sahmi xuta filisteo cojo me

(Jueces 13-16)

Hya xi camá ne, xi cavatju cahme Abdón ne, xuta tjë rë Israel jan ne, ngu ndiya nga ha quihndë cafaharcuaain me Nina. Hya ne, casua Nina cahndë xi xuta filisteo scaa rë me tsingujne me

cjuatacun rē xuta tjē rē Israel jan. Hane me xi cuacun vėhė casahmi me gobiernu xuta tjē rē Israel.

Nixtin hya ne, Nina catsingatju me ngu ángel quiji cachja cojo ngu na tjē rē Israel, ngu na xi hatuxa sacuiin rē quihndi. Hane ángel jan ne, cachja cojo rē na xi Nina sahmi me xi sacu rē na quihndi, peru meje rē xi na vėhė ne, cuiin camaha ni na nandá cjan rē ta quihndi xi sacu rē na jan ne, ngu nazareo má quihndi. Vėhė xi suva ni xa xi Nina cuitexa me, vėhė ni sahmi quihndi hya xi cuma jyė cojo yėjė nixtin xi sua Nina cjuahñu. Hatuxa cuatiin na tsja rcu quihndi jan, hacuaha cachja ángel xi cha vėhė sahmi cha si cojo xuta filisteo. Xi cavatju ángel jan cafe ne, cafehe xihin rē na hane sehe casuacuenda na cjua xi cachja ángel jan. Hya xi camá ne, catsingatju nga Nina ángel jan ngu ndiya xi cuichja xcun cojo xcun cojo xihin rē na, cojo sa xi xihin rē na ne, cumacjain rē cha xi cjuaquixi cjua xi cachja na cojo xihin rē na. Hya xi camá ne, cavetjucaa jain sacuatjin cachja ángel jan ta casacu rē na ngu quihndi, hane Sansón casuañihi na quihndi jan. Hane jercu hñu ngahñu xi casacu rē Sansón ta tsėhė xi Nina cavisecoo rē cha. Jemu cjín xuta filisteo catsiquehen cha hane hacuaha cha vė ne, cavaca

cha nguijña rë me. Hacuaha camá cha juez tsëhë xuta tjë rë Israel
cahntsua can nu.



Hane xuta filisteo jan ne, tsëhë xi meje tsiquehen me Sansón,
pero tsacjun me ngahñu rë cha, cafehya me favor cojo rë na Dalila,

ngu chjuun xi jemu camameje rë Sansón, cafehya rë me xi cuinenguise na Sansón ¿mé má cuatjin jemu hñu ngahñu rë?, sehe tsicuya na cjua tsëhë me. Hisca casua me cjua rë me xi sua me na tujún, sa xi sahmi na sacuatjin xi meje rë me. Ngajan xi na vëhë ne, cavangui na chuva rë hacutjin cuma xi cuinenguise na Sansón: ¿mé má cuarcu hñu ngahñu rë me? Peru Sansón ne, cavindacha me na ta cachjaain me cojo rë na cjua xi cjuaquixi, cuitjin cavindacha me na cachja me:

—Sa xi nihñu ná cojo yatu chuxinhndë xi hacuiin cachjan ne, cuya cumandaya ngahñu naha sacuaaha tu yo ni xuta. —Cuatjin cachja me.

Cuatjin camá xi na vëhë ne, cachja na cojo xuta filisteo xi cjue cojo me yatu chuxinhndë xi hacuiin cachjan sehe tsihñu na Sansón, hane xuta filisteo jan ne, xi cafehe me ne, caviyujhma me ngajan ndava na. Hya xi camá catsihñu na me ne, sehe cachja na cojo Sansón xi xuta filisteo ne, siu me ngajan xi cjuaha me Sansón. Peru Sansón ne, ha ndastu chja camá cavicheya me chuxinhndë jan sehe

camandaya me. Hya xi camá ne, ngu ndiya nga cavinenguise Dalila me tséhë cjuatacun vë. Cuitjin cachja na:

—Hacuiin cjuaquixi xi canújun cojo ná. Quihdë tinújun cojo ná cjuaquixi jain tséhë mé má cuatjin jemu hñu ngahñu nuju.

—Cuatjin cachja na.

Pero Sansón ne, cavuya cavindacha nga me na, cachjaain me cojo rë na cjua xi cjuaquixi. Cuatjin cachja me:

—Sa xi nihñu ná cojo nahñu liya xatsë ne, cuya cumandaya ngahñu naha sacuaha tu yo ni xuta. —Cuatjin cachja me.



Hane na vëhë ne, catsihñu na me cojo nahñu liya xatsë. Hane jinguyëjë rë ne, xuta filisteo ne, ha hinchahma me ngajan. Ngajan xi na vëhë ne, cachja nga na cojo Sansón xi xuta filisteo ne, ha siu me jan xi cjuaha rë me, pero Sansón ne, ha ndastu chja cama cavicheya me nahñu liya jan. Ngajan xi na Dalila ne, cavinenguise nga na me ngu ndiya nga, hane Sansón ne, cachja nga me ngu cjuandacha cojo rë na, cuitjin cachja me:

—Sa xi ndaja hñu nihñi lasu tsjarcu ne, cuya cuma ndaya nga ngahñu naha sacuaha tu yo ni xuta. —Cuatjin cachja me.

Hane na vëhë ne, cuatjin casahmi na; peru hora xi cachja na cojo rë me xi xuta filisteo ne, cjuaha rë me ne, cavundecja me lasu xi tjihñu tsjarcu me cojo cinta xi tjihñu rë hane cafahaxin me. Ngajan xi na vëhë ne, hitsë sa casuaxti na me. Cuitjin cachja na:

—Ngaye ne, hacuiin cojo yëjë cjuaquixi xi hmutacun ná; ta sa xi hmutacun jain ná cojo cjuaquixi ne, ha hisca ha canoje cojo ná cjuaquixi tsëhë cjua xi vinenguise ri. —Cuatjin cachja na.

Hane tsëhë xi jemu casuaxti na me ne, hiscan xi cajnetaha ne, sehe cachja me cjuaquixi cojo rë na. Cuitjin cachja me:

—Tsëhë cjuatacun xi cuatjin jemu hñu ngahñu naha ne, tsëhë xi hisca hya xi jiyahma ngahan cahntsua naa naha ne, cachja me ta suva ni xa xi Nina cuitexa me ne, xa vëhë ni xi sahme, hacuaha tsjarcu ne, hatuxa catinsiin rë. Sa xi cuichunsun tsjarcu ne, cuya cuma ndaya ngahñu naha sacuaha tu yo ni xuta. —Cuatjin cachja me.

Ngajan xi na vëhë ne, catsingatju nga na cjua rë xuta filisteo jan hacuaha casahmi na xi cafañafë Sansón jan. Sehe cavanguise na ngu xuta xi cavejnu rcu me. Hya xi camá ne, sehe cachja nga na cojo rë me xi xuta filisteo ne, cjuaha rë me. Hane Sansón ne, cavisatjenhnga me peru hviin me xi Nina ne, ha quihndë tivisecuaain rë me. Hya ne, cama cafaha xuta filisteo me. Hacuaha cavanguihmu me tuxcun Sansón, sehe quiji cojo me ngasun ladu rë xuta filisteo. Ngajan catsihñu me Sansón cojo cadena sehe caveya me ndavaya. Hacuaha cavetaha me cahvo trigu tsëhë me.



Cahntsua nixtin xi caseya Sansón ndavaya ne, cavetsihin camá nduju nga tsjarcu me. Ngu nixtin jan ne, jinguyējē rē xi jemu cjin xuta filisteo siu me tisahmi me suhi rē nina ndacha rē me ne, cavitexa xuta jan xi cjuechjaha rē Sansón xi tsixcuehyu xuta me. Hya ne, ngu cha xi chuva nixtin rē cjui cojo cha me, hane cafehya me cha favor xi hiscan hinchacun tiña jo yase xi yahahnga rē ndihya jan cjuecojo cha me cojo sa xi cuma cuechutaha tyja rē me xi cjuaha me catsijo yase jan. Hya xi camá ne, sehe casahmi Sansón oración rē me cafehya rē me Nina xi cuisecoo rē me ndastu hya sa. Sehe

quiji me cavataha me catsijo yase jan catsivaha me taha xcun me.
Casahmi me xi setaha nga xin ndihya. Hya xi camá ne, ndihya jan
ne, cjanenguiya cahndë hiscan siu xuta cjín jan. Cahme Sansón hora
vëhë peru hacuaha hya ne jercu cjín xuta filisteo catsiquehen me.
Cjín sa me catsiquehen me hya xi cumá rë xuta xi ha catsiquehen me
nixtin xi cavejña me xcun cjuahñu rë me.



**Casacu rē na Rut cjuatacun xi Nina cjuaquixi ni
meje rē xi cjuaharcun na**

(Rut 1-4)

Cahntsua nu xi tjin juez xi sahmi me gobiernu xuta nangui Israel ne, jemu jindya camaha ni camá. Hane xi jindya camá ne, ngu me xi tsēhē ngu ndihya tjē rē Judá xi hmí rē Elimelec ne, quiji cavejñacahndē me nangui xi satē rē nandya Moab. Hacuaha quiji cojo me na Noemí, chjuun rē me, cojo catsijo cha quihndi rē me. Ngu cha jan ne, Mahlón hmi rē cha, hane cha xingu ne, Quelión hmi rē cha. Sehe Elimelec ne, cahme me ngajan nandya Moab. Hya xi camá ne, catsijo cha quihndi rē me jan ne, cavixan cha cojo rē na moabita. Cha Mahlón ne, cavixan cha cojo rē na Rut; hane cha Quelión ne, cavixan cha cojo rē na Orfa. Hya xi camá ne, catsijo ni cha jan ne, cahme cha. Hane sacuahá Noemí, naa rē cha ne, jemu camá va rē na ta cahan na, hacuaha catsichaja na catsijo quihndi rē na.

Xi camá chuva sa nixtin ne, camachaya rë na Noemí xi tivetsihin sacu nga xichine ngajan nangui Israel, hane cavejñacacun na xi cuya cjué na nangui rë na. Sehe cachja na cojo jahnda rë na. Xi má rë na ne, hitsë sa ndaja sá xi cuya cjué na ndava xuta rë na, peru na jahnda jan ne, catiyuju na cojo sa xi catuya catixan na cojo xihin nangui rë na. Hya xi cavisiajmi me ne, na Orfa ne, cavejñacacun na xi cuya cjué na ndava xuta rë na, hane cuatjin casahmi na. Peru na Rut ne, meje cjue na cojo na Noemí. Vëhë xi cachja Rut xi hatuxa cuejña na cojo na Noemí. Cachja na xi xuta nandya rë Noemí ne, hacuaha xuta nandya rë na Rut cumá me. Hane Nina xi faharcun Noemí ne, hacuaha me vëhë cumá me Nina rë na Rut. Hya xi camá ne, Noemí ne, casua na Rut cahndë xi cjue



na cojo rē na, hane quijicojo xicjin na ngajan ciuda Belén, hiscan xi catsin na Noemí.

Hane nixtin xi cafehe na nandya Belén ne, xuta nandya jan ne, sehe tivetsihin tivunihnga me xitjē rē me. Hane na Rut ne, cavinenguise rē na Noemí ta, ¿há sua na na xi cuisehen na Rut ngajñi xitjē hiscan xi ha cafē cavunihnga xuta xitjē rē me? Ngajan cjuaya na tutjē xi cavixu tsēhē xuta xi cavunihnga xitjē rē jan hane sacu xi sinē me. Hane tsēhē xi xuta tjē rē Israel ne, hatuxa má xcusun rē me ta sua me cahndē xi xuta yuma ne, cjue cjuaya me tutjē xi cavixu jan ne, vēhē xi na Noemí ne, casua na cahndē. Jnu xitjē hiscan quiji na Rut jan ne, ngu nangui tsēhē ngu me nchina xi



hmi rë Booz. Hane Booz jan ne, hacuaha xicjin nima xihin rë na Noemí má me. Cavëë Booz na Rut ngajñi xitjê rë me, hane cavinenguisse me yo má na. Sehe jemu ndaja cavisiajmi me cojo rë na, ta cachja me xi hacuiin cumacjincacun na, ta nchunchujun ni cuya cjuaya na tutjê ngajñi xitjê rë me. Hane na Rut ne, cavinenguisse na ta, ¿mé má cuatjin jemu ndaja visiajmi me cojo na?, ta na ngu nangui na. Hane cachja me cojo rë na ta camachaya rë me xi jemu ndaja tisahmi na cojo nahya rë na, na Noemí. Hane tsêhê xi camacjain rë na xi Nina cuisecoo rë na ne, vêhê xi tsicuya Nina cjuandaja xi casahmi na. Hacuaha casua me hitsê niñu xi sinê tajñu na. Sehe cachja me cojo xuta xi sahmi xa rë me xi tsicangui me hitsê tutjê cojo sa xi hitsê sa cjin sacu cjuaya na. Cojo cjuatacun vêhê ne, na Rut ne, casacu rë na tutjê hacutjin xi cacaa rë na. Sehe cavaniji na quiijicojo na ndava na Noemí.

Hya xi camachaya rë na Noemí xi na Rut ne, quiji na ngajñi xitjê rë Booz xicjin na ne, jemu ndama rë na. Sehe cachja na cojo rë na Rut xi cuya cjue cjuaya na ngajan. Xi meje rë na Noemí ne, cuixan na Rut cojo Booz sacuaha xcusun xi sahmi xuta tjê rë Israel hya xi cueya ngu xihin hane hisca ngu quihndi casacuiin rë chjuun

rë cha. Ta sacuaaha xcusun vëhë ne, ngajñi rë cha xicjin nima xihin rë na cahan jan, cha xi hitsë sa tiña xicjin nima ne, meje rë xi cuatsë cha nangui rë nima hacuaaha cuixan cha cojo rë na cahan jan. Cuatjin sahmi me cojo sa xi sacu quihndi xi cuma sacuaaha quihndi rë nima. Hya xi camá ne, na Noemí ne, catsingatju na na Rut xi cjue cuichja na cojo Booz xi cuixan na cojo cha. Hane cuatjin casahmi na Rut. Hya xi camá ne, Booz ne, cachja me ta cuma cuixan me cojo ra, peru tacun sa ngu cha xi hitsë sa tiña xicjin nima xihin rë na xi cuma rë me suva me. Vëhë xi meje rë xi cuichja me titjun cojo cha vëhë ne, ¿mé cuichja cha? Cuatjin cachja Booz. Sehe casua sa me na tutjë xi cuaha na cjuatjo tsëhë na Noemí, sehe catsingatju me na cafe na ndava na.

Hya xi camá ne, ha nixtin hya ni ne, quiji Booz tingotjo hnhua casexo rë xi jiyandee rë ciuda jan ne, ta ngajan matangun xuta xihin. Hane ngajan cavejñaya me hisca xi cavatju cha xi hitsë sa tiña xicjin nima Mahlón jan. Hane xi cavatju cha vëhë ne, Booz jan ne, cavinenguise me cha, ¿há cuatsiin cha ngu rqui nangui rë nima Mahlón, hacuaaha cuixan cha cojo na Rut? Cachja cha xi handasa meje cuatsë cha nangui, cumajin, ta cumajin cuixan cha cojo na Rut.

Cuatjin camá xi Booz cavatsë me nangui jan, hacuaha cavixan me cojo rë na Rut. Hya xi camá ne, casacu rë na cojo me ngu quihndi xi casuañihi rë me Obed. Peru camá cuenda quihndi jan sacuaaha xi quihndi rë nima Mahlón. Na Noemí ne, jemu ndaja cama rë na xi casacu rë na ngu xi camá sacuaaha quihndindai rë na, hacuaha na vëhë cafachacuenda na quihndi jan. Yëjë ni yachjin xi tsëhë nandya Belén ne, jemu ndaja camá rë me xi casacu rë Noemí ngu quihndi xi cjuahacuenda rë na hya xi cuma changá na. Hya xi camacha Obed ne, casacu rë me ngu quihndi cojo chjuun rë me, Isaí hmi rë quihndi jan. Isaí jan ne, me vëhë xi camá nahmi rë David, ngu me xi camatitjun camaha ni tsëhë xuta tjë rë Israel.

Cavechu ngu nixtin xi camá Samuel ngu profeta xi cama cavisiajmi cojo Nina

(I Samuel 1-3)

Ngajan nangui Israel, cahntsua xuta tjë rë Efraín ne, tjin ngu xihin xi hmi rë Elcana. Cha Elcana ne, jo má chjuun rë cha. Hane na xi hmi rë Ana ne, hatuxa majin sacu rë na quihndi. Jemu choho má rë na ta tsëhë xi na xingu ne, tsixcuehyu na na. Nu nu ni ne, fi

cha Elcana cojo xuta ndava cha hiscan nandya xi hmi rē Silo,
cahndē hiscan xi cavejña yungun rē Nina hatsēē nixtin. Hane ngajan
tsiquehen cha ngujo chu sacuaha cjuatjo xi sua me cojo Nina. Ngu



ndiya xi Elcana quijicojo Ana ngajan Silo ne, quiji Ana tingotjo
yungun. Hane ngajan casahmi na oración rē na. Cafehya na favor
cojo Nina xi sua Nina na ngu quihndi xihin. Hacuaha casua na cjua
rē na cojo Nina xi quihndi xi sacu rē na ne, hatuxa xa xi cuitexa
Nina xi sahmi cha, ha xa vĕhē ni xi sahmi cha nixtin xi sua Nina

cjuahñu rë cha. Cuatjin sahmi xu na sá xi cjuayangui Nina oración xi sahmi na. Hane nahmi Elí ne, cavëë me na hya xi casahmi na oración rë na. Xi camá nchujun ne, cavuya cha Elcana ndava cha cojo yëjë xuta rë cha. Hane xi cavatju ngujo nixtin jan ne, caseya quihndi rë Ana. Hane xi cavatju nixtin xi cavechu sa rë quihndi ne, hya catsin ngu quihndi xihin. Quihndi vëhë ne, casuañihi rë me Samuel.

Hane xi cavechu nixtin xi ha quihndë cavaquiin Samuel ne, quiji naa rë cojo ngajan yungun rë Nina. Hane ngajan casahmi na entregadu cha cojo Elí, me xi matitjun tsëhë yëjë nahmi yungun. Cachja na ta Samuel ne, vëhë quihndi xi cafehya rë na Nina. Hacuaha ha hisca hya cachja na xi tsëhë Nina cumá quihndi vëhë. Sehe casahmi Ana oración rë na, casua na nacuechji rë Nina tsëhë xi cafayangui Nina tsëhë oración rë na. Hya xi camá ne, yëjë ni xuta rë Elcana cavuya cafe me ndava me, peru quihndi Samuel jan ne, cavejña cha cojo Elí. Hane nu nu xi cafehe naa rë quihndi jan yungun rë Nina cojo Elcana ne, vaha na ngu tsjian xatsë rë quihndi jan ta tijima jyë cha.

Nahmi Elí jan ne, hacuaha tjin rë me jo quihndi xi hacuaha nahmi má. Ngu cha ne, Ofni hmi rë; hane ngu cha ne, Finees hmi rë. Pero catsijo me xi cuacun jan ne, hatuxa vihndiin me tsëhë Nina. Hya xi ficojo xuta tjë rë Israel chu xi tsiquehen me sacuaha cjuatjo xi sua me cojo Nina ne, cha Ofni cojo cha Finees ne, jemu meje xati rë me yojo xi satë rë me sacuaha nahmi. Hisca majin viyujuya me hisca xi cama cachjan xine rë chu xcun Nina ta, xi tu camá catsiquehen xuta chu jan ne, ngutjen ni fi fehya me yojo. Hacuaha sahmi me cjuatsehen cojo yachjin xi viyuju sahmi cuidadu ndava Nina jan. Elí ne, hacuaha cján me cojo quihndi rë me xi choho xcusun rë me, peru quihndi jan ne, vihndiin me cjua xi chja nahmi rë me. Jemu hangu xcusun cha Samuel ta, hatuxa meje cjuaharcun cha Nina. Tsajin camaha ni rë cha xcusun sacuaha xcusun rë quihndi xi cuacun vëhë.

Ngu nixtin jan ne, caféhe ngu profeta cavusehenhya rë Elí. Profeta jan ne, cavitexa Nina me xi cuichja me cojo Elí xi sacuiin xuta tjë rë me ta tsëhë xi tsingatihin me xi quihndi rë me ne, sahmicuendaain cha Nina. Hacuaha cachja profeta jan xi cojo sa xi

cumatsejen xi quixi xi Nina catsingatju me cjuá vëhë, hya xi cuechu nixtin xi cueya quihndi ne, cueya catsijo ngu nixtin ni.

Cavechu sa nixtin hane camá changá Elí. Hane ngu nguixun xi jiñafë me cahntsua yungun rë Nina sacuaaha xcusun rë me ne, ngajan xi cavasca rë Samuel tsëhë xi cahndë me xi jindaya ngu xi jindaya rë me cojo ñihi rë me. Hane tsëhë xi hatuxa camacacun me xi Elí cajindaya rë me ne, marcu macjain quiji cachja me cojo Elí. Cuitjin cachja me:

—Cuajyihí ngahan nguehe. —Cuatjin cachja me.

Ngajan xi Elí ne, cachja me ta cajindayaain me. Hya xi camá ne, hacuanitjin ni camá sa jo ndiya. Hane xi majyan ndiya jan ne, camachaya rë Elí ta Nina xi cuatjin jindaya rë Samuel. Ngajan xi cachja me cojo Samuel xi catuya nga me catjin catjaña me, hane sá xi cuihndë me xi cuichja nga ngu ndiya ne, sehe ngajan xi hacui Nina xi chja me. Hane catjayangui Samuel cuitjin: “Tinújun tatá, ta tivisiñuju tsujun”. Cuatjin cjuayangui Samuel xi cachja Elí.



Hya xi camá ne, cavuya quiji cafaña nga Samuel. Sehe Nina ne, cajindaya nga me ngu ndiya nga cojo ñihi rē Samuel. Hora vëhë ne, cafayangui Samuel sacuatjin xi ha cachja Elí cojo rē me. Hane Nina ne, cuitjin cachja me:

—Yëjë ni cjua xi cachjá cojo Elí xi choho cuatju cha cojo xuta tjë rē cha ne, cjuaquixi xi cuatjin cuetjucaa. Tinoje cojo cha Elí ta vëhë ngu castigu xi cuatju cha tsëhë yëjë cjuatsehen xi casahmi quihndi rē cha, hacuaha tsëhë xi ha ndaja vëë cha xi choho sahmi

quihndi rē cha, hane cachjataain cha quihndi rē cha. —Vēhē cjua xi cachja Nina cojo Samuel.

Hane xi camanchujun jan ne, Samuel ne, tsacjun me suacuenda rē me Elí yējē cjua xi cachja Nina cojo rē me. Peru Elí ne, casahmi me ngujoyē xi cachja Samuel. Hya xi camá ne, cachja Elí xi Nina ne, hatuxa sahmi me ngu xcusun xi tsingatahacacun me xi ndatjin. Cuatjin cafayangui Elí.

Hane Samuel ne, camajyē me. Nina casua me cahndē xi cuichja me cojo xuta mé xcusun xi cuetjucaa ngascan. Hane cjua vēhē xi cuichja me ne, hatuxa cuetjucaa jain sacuatjin cuichja Samuel. Ngajan xi yējē xuta ne, camachaya rē me xi Samuel ne, ngu profeta rē Nina me.

Cacaain rē xuta tjē rē Israel cojo xuta filisteo

(I Samuel 4-7)

Sacuaha nixtin xi cahme Elí cojo quihndi rē me ne, yējē xuta filisteo ne, camatangun me, cavēhēchjine me yojo rē me sacuaha

sindadu xi cjue sahmi me si cojo xuta tjë rë Israel. Hane xuta tjë rë Israel ne, hacuaha casahmitangun me xuta rë me. Nixtin tjun tsëhë si ne, cacaain rë xuta tjë rë Israel cojo xuta filisteo. Ngajan xi xuta tjë rë Israel ne, xi ma rë me ne, meje rë hitsë sa ngahñu cjua, hane caviyujucacun me xi cuaxë me caxa ximinchacun tsëhë yungun rë Nina hane cjuecojo me ngajñi rë si. Catsingatahacacun me xi, xi cuatjin sahmi me ne, ha tuxa sahmi ngujoyë xi cuisecoo me Nina xi scaain rë xuta filisteo cojo rë me. Cuatjin camá xi catsingatju me ngujo xihin ngajan Silo xi cjuejaha caxa ximinchacun jan. Hane xi cafehe caxa ximinchacun jan ne, sehe cavetsihin sahmi me si ngu ndiya xatsë nga ngajñi rë xuta tjë rë Israel cojo xuta filisteo. Pero cuanitjin choho cavetju cojo si, hisca nixtin hya ne, caffè sindadu ladu xuta tjë rë Israel ta catsiquehen xuta filisteo me. Catsiquehen me can të mil sindadu rë xuta tjë rë Israel, hacuaha cojo catsijo ni me xi quihndi rë Elí jan catsiquehen xuta me. Hacuaha cafaha xutaxin jan caxa ximinchacun jan. Hya xi camá ne, xi camachaya rë Elí cjua xi jemu chohotjin camá ne, caticja ngaxtun me xin tsëhë silla xi tacun me. Hane hora hya ne, cati rë ngaxtun nguysin me ne, cahme me. Ngajan cajnetaha yachan nu xi camá me juez tsëhë xuta tjë rë Israel.



Hya xi camá ne, xuta filisteo jan ne, quijicojo me caxa ximinchacun jan ngu ciuda rë me, sehe cavejña me caxa jan ngajan yungun rë nina ndyojo rë me. Peru xi quiji me yungun rë me xi cama nchujun ne, cavëë me nina ndyojo rë me jiña nangui. Hya xi camá ne, quiji me cafaha me nina ndyojo jan cavejñandaja nga me cahndë rë hane quiji me. Hane xi cavuya nga me yungun ne, cavëë me xi jiña nga nangui nina rë me, pero hacuiin tu cjanengui ni ta

hisca cavacjan rcu hacuaha catotoho tyja rë. Hacuaha xuta ciuda jan ne, cavetsihin cavatju me ngu cjuañihi tsëhë nisen ta jemu camacjín chu. Hacuaha jercu casatë camahani rë me ngu chíhin xi vetju rë me nindu. Cuatjin casahmi Nina xi cavetju me cjuañihi ta tsëhë xi quijicojo me caxa ximinchacun jan ciuda rë me. Hya xi camá ne, cavaxë me caxa ximinchacun hane quijicojo me ngu ciuda xi hacjahi. Peru tu jarë ciuda xi fehecojo me ne, hacuaha cuatjin vetjucun rë xuta chíhin vëhë. Hya xi camá ne, cavinenguisse rë me nahmi hacuaha cavinenguisse rë me xuta xi ma sahmi adivinar ¿mé ndatjin sahmi me? Hane xuta xi ma sahmi adivinar jan cojo nahmi jan ne, cachja me xi ndatjin rë xi chjaha rë jo chu ndyaja xi naa ru hane cumahñu chu xi scavë chu ngu carreta. Hane xcun carreta sesun caxa jan cojo ngujo cjuatjo xi jercu venguichji rë. Sehe tsismi xu me chu xi cjue chu cojo ha tu jani ni xi meje cjue chu. Cuatjin sahmi xu me cojo sa xi Nina rë xuta tjë rë Israel ne, cjuë xi cjan rë me cojo xuta xi cuacun vë. Cuatjin cachja me. Hane cuatjin casahmi xuta jan. Sehe quiji ndyaja hacutjin meje cjue chu cojo carreta jan. Ngajan xi ndyaja jan ne, ngu quixi ni quiji chu ciuda xi hitsë sa tiñataha tacun xi tsëhë xuta tjë rë Israel. Sehe ngajan

camachaya rë xuta filisteo xi hatuxa cun rë caxa ximinchacun jan, hacuiin tu cuenda camá cjuañihi xi cavatju me.

Hya xi camá ne, yějë xuta xi siu cahndë jan ne, xi cavëë me xi cafehe chu ndyaja jan cojo carreta xi yaha rë caxa ximinchacun jan ne, jemu ndaja camá rë me. Ciuda xi cavechu chu ndyaja cojo carreta jan ne, hacuaha caviyujutaha nahmi ladu rë xuta tjë rë Israel. Hya xi camá ne, sehe catsiquehen me chu ndyaja jan xi casua me sacuaha ngu cjuatjo tjinchihin cojo Nina. Ya xi camá cojo carreta jan ne, ha vëhë ni casahmi me sacuaha chaquin. Hane cavesun me cjuatjo jan xcun ngu ndyojo xi tacun tiña jan. Pero camá xi ngujo me xi siu nandya jan ne, cavutsejen cavutsejenya me cahntsua caxa ximinchacun jan. Hane xi cuatjin casahmi me xi cafaainrcun me caxa jan ne, camacjan rë Nina cojo rë me. Hane jemu cjín me xi cuacun jan cahme me ta cuatjin casahmi Nina xi cahme me. Hane xi cavëë yahnga xuta ngajan xcusun vë ne, jemu quijircu rë me, sehe catsingatahacacun me xi hitsë sa ndaja xi titsingatju me caxa jan jingu sa cahndë. Cuatjin camá xi cachja me cojo xuta tsëhë ciuda xi hmi rë Quiriat-jearim xi cjuecojo me ngajan nangui rë me. Hane

xuta tsëhë ciuda vëhë ne, quiji cojo me caxa jan nangui rë me, hane ngajan cavejña sacuaaha can nu.

Hya xi cahme Elí ne, cavisehen Samuel xi camá me juez tsëhë xuta tjë rë Israel. Cavejñataha Samuel ngu ciuda xi hmi rë Ramá. Ngajan ndava me, peru nu nu ni tjin jyan ciuda rë xuta tjë rë Israel xi fi fahacuenda me cjuacjintacun rë xuta tjë rë Israel. Hya xi cavatju can nu xi cavuya cafehe nga caxa ximinchacun jan nangui rë xuta tjë rë Israel ne, caviyujucacun xuta xi ha quihndë cjuaharcuaain me nina ndacha ta, cuya cjuaharcun me Nina xi cjuaquixi jan. Hane xi cuatjin caviyujucacun me ne, cuatjin camá xi Samuel ne, cachja me cojo xuta tjë rë Israel jan xi cjue me ngajan ciuda Mizpa, ngajan cjuaharcun me Nina. Hane xi cafehe xuta ciuda vëhë ne, cavijacun me jyê rë me cojo Nina. Jinguyëjë rë xi tijima vëhë ne, camachaya rë xuta filisteo xi siutaha me ngajan, hane caviyujucacun me xi sahmi nga me si cojo xuta tjë rë Israel. Xi tu camachaya rë xuta tjë rë Israel xi nduvatjengui xuta filisteo me, jemu catsacjun me camá. Sehe cachja me cojo Samuel xi sahmi me oración tsëhë xi cuisecoo Nina me. Hane Samuel ne, cuatjin casahmi me. Catsiquehen me ngu chu tsánga xi sua rë me Nina sacuaaha ngu cjuatjo xi tjinchihin.

Hane Nina ne, cahndë me oración xi casahmi Samuel. Sehe casahmi Nina xi jercu tu hñu camaha ni catsinga ngu chuhun, hane sindadu rë xuta filisteo ne, catsacjun cha camá. Ngajan xi sindadu rë xuta tjë rë Israel ne, quiji casahmi cha si cojo xuta xi cuacun jan. Jemu cjin xutaxin jan catsiquehen cha me. Hya xi camá ne, xuta filisteo ne, caviyuju cahndë me nangui rë suva me. Jyë nixtin cavatju xi ha quihndë casahmii me si cojo xuta tjë rë Israel, hane camá cjuajeya.



Casuaxa Nina Saúl xi cumatitjun me tsëhë xuta nangui Israel

(I Samuel 8:1-13:2)

Hya xi ha jemu changá camá Samuel ne, casuaxa me jo quihndi rë me xi cuma cha juez tsëhë xuta nangui Israel cahndë rë suva me. Peru quihndi rë me ne, hacuiin cuatjin ndatjin camachjirëhë cha xcun xa rë cha xi má cha juez sacuaha camachjirëhë nahmi rë cha. Cha vëhë ne, cafaha cha tujún xi vaxëndaja cha xcusun rë xuta tsehen, hane hacuaha hisca suva cha ne, tsehen cha. Cuatjin camá xi xuta changá tsëhë xuta tjë rë Israel ne, quiji cachja me cojo Samuel xi suaxa me ngu me xi cumatitjun camaha ni tsëhë xuta tjë rë Israel cojo sa xi cuma sahmi rë xuta gobiernu. Samuel ne, cachuyiin rë me cjuajan, pero cafehya rë me Nina xi cuisecoo rë me hacutjin ndatjin sahmi me. Hya xi camá ne, cachja Nina ta catisahmi Samuel hacutjin xi tichja xuta jan. Hacuaha cachja sa Nina cojo rë me xi sacuaha cjuatacun vëhë ne, hya xi titsitjungui xuta me xi má me xuta xi matitjun, ngaxtun vëhë ne, jemu jyë cjuañihi cuatju xuta cuma ta, me xi matitjun jan ne, sahmi me xi jemu hnga cuechjitje xuta hacuaha sahmi me ngu jyë xi sahmi xuta xa rë me. Sehe choho cuma

rë xuta xi cuatjin cafehya me ngu me xi cumatitjun tsëhë me. Peru cachja sa Nina xi hya ne, tsajin rqui rë ta ha quihndë tsajin mé xi cuma sahmi xuta xi tsindeya me cjuatacun rë me xi matitjun jan. Cuatjin cachja Nina cojo Samuel.

Hya xi camá ne, sehe cavuya cachja Samuel cojo xuta sacuatjin cachja Nina cojo rë me. Peru xuta jan ne, casahmicuendaain me cjuandaja xi cachja Samuel cojo rë me, ta tu cachja sa me xi meje rë me xi sacu ngu me xi cumatitjun tsëhë me sacuatjin tjin rë me xi matitjun jingu sa cahndë tahndee jan.

Ngajan xi Nina ne, cavitexa me Samuel xi sahmi me hacutjin xi chja xuta jan. Hacuaha cachja sa me cojo Samuel xi me vëhë cuichja me yo xi suaxa Samuel xi cumatitjun tsëhë xuta jan. Cuitjin cachja Nina:

—Hora vihi nchujun ni tsingátju ri ngu cha tsëhë ngu ndihya xuta ladu rë Benjamin. Hane titejni aceite rcu cha cojo sa xi cumatsejen xi cha vëhë cumatitjun camaha ni cha tsëhë yëjë xuta tjë rë Israel. Hacuaha cha vëhë ma capitán rë sindadu xi cuaxëtje cha

xuta xi cuacun vë tsëhë si xi sahmi xuta filisteo cojo rë me.

—Cuatjin cachja Nina cojo Samuel.

Hane cuatjin camá. Xi camá nchujun jan ne, cafehe ngu cha xi hmi rë Saúl ta meje cuisiajmi cha cojo Samuel. Cavinenguisse cha jani cuma sacu rë cha burru rë nahmi rë cha xi cachaja chu. Hane Nina ne, cachja me cojo Samuel xi cha vëhë xi cumatitjun cha tsëhë xuta tjë rë Israel. Ngajan xi Samuel ne, cachja me cojo Saúl ta burru jan ne, ha casacu chu. Sehe cachja me xi cjue sinë Saúl niñu cojo rë me ta tsëhë xi nixtin hya ne, tijima ngu suhi xi sahmi jyë sahmi hnga me Nina.



Hya xi camá ne, cavaha xicjin catsijo me quiji me hiscan tacun ngu ngasuncun. Hane xi cafehe me ngajan ne, sacuaha cafaharcun Samuel Saúl ta casua me cha ngu rqui yojo xi hitsë sa ndaja xi sinë Saúl. Hacuaha cachja me cojo Saúl xi ndava me cjue cjuañafë Saúl nguixun hya. Hane xi camá nchujun jan ne, catsijo me quiji me tjehe nandya, hane ngajan cavitejnu Samuel hitsë aceite rcu Saúl sacuaha seña xi cuma me me xi matitjun. Hacuaha cachja me cojo rë Saúl xi cuatjin cumá. Sehe cachja me cojo Saúl xcusun xi cuatju Saúl hya xi cuya cha ndava cha. Hane cuaha jain tjin camá yëjë ni sacuatjin cachja Samuel. Xi cajnetaha cachja Samuel ne, casua Nina Saúl cjua sacuaha casua me cjua cojo yëjë profeta, hacuaha cavisecoo Nina Saúl xi sahmi me sacuaha ngu xuta ha jemu tjinchihin cjuatacun rë ta cavindeya cjuatacun rë me. Pero xi cavuya cafe Saúl ndava me ne, cachjaain me cojo xuta rë me mé xi cachja Samuel cojo rë me xi me vëhë cumatitjun me tsëhë yëjë xuta tjë rë Israel. Suva ni cjua xi cachja Samuel cojo rë me tsëhë chu burru jan ne, cjua vëhë ni xi cachja me.

Ngajan xi Samuel ne, cachja me cojo yëjë xuta tjë rë Israel xi cumatangun me ngajan ciuda xi hmi rë Mizpa, ta ngajan cuaxijin me

yo xi satë rë suerte xi cumatitjun tsëhë yëjë xuta tjë rë Israel. Hya xi camatangun me ne, tjun tjun ni me, casatë rë suerte xuta tsëhë ndihya xuta tjë rë Benjamin. Hane ngajñi xuta jan ne, xi cavaxijin me xi majo ndiya, casatë rë ndava xuta rë Saúl. Hane xi camá jyan ndiya cavaxë me suerte tsëhë yo tsëhë ndava jan ne, casatë rë suva camaha ni Saúl. Peru hya xi casatë rë Saúl ne, tsajin xti Saúl. Hane xi cavinchise rë me, casacu me ngajñi rë chaha xi siu, ngajan jiyahma me. Sehe quiji xuta quiji jaha rë me. Ngajan xi Samuel ne, casuacuenda me xuta jan xa xi satë rë Saúl sacuaaha me xi matitjun. Hisca catsihindu me yëjë xa xi satë rë ngu me xi matitjun xcun ngu xujun. Sehe cavinchandaja xujun jan cahntsua yungun tsjian. Hane xi cajnetaha cjua ne, sehe catsingatju me xuta cafe me ndava me jima jima ngu me. Hane Saúl ne, hacuaaha cavuya cafe me ndava me, peru ngujo sindadu rë xuta tjë rë Israel ne, quijicojo me.

Hya xi camá ne, xi cavatju sacuaaha ngu sa xi cafaha xa Saúl ne, camá xi sindadu rë xuta amonita ne, casahmi cha si cojo ngu ciuda rë xuta tjë rë Israel. Hane xi camachaya rë Saúl cjua vëhë ne, casahmi tangun me sindadu xi cjue cuisecoo ciuda jan. Hane tsëhë xi cavisecoo Nina me ne, cama cavaxëtje me ciuda vëhë. Hane xi

cavutsejen xuta xi cuatjin casahmi Saúl ne, xuta tjë rë Israel ne, camacjan rë me cojo yahnga xuta xi miji rë me xi Saúl cuma me xuta xi matitjun tsëhë me, hane meje tsiquehen me yëjë xuta jan. Peru Saúl ne, casuaain me cahndë xi cueya xuta ta tjin cjuasua xi Nina ne, cavisecoo rë me nixtin hya. Xi cavatju si vëhë ne, xuta tjë rë Israel jan ne, café me ngu ciuda xi hmi rë Gilgal, hane ngajan catsiquehen me ngu jo chu xi sua rë me Nina sacuaaha ngu cuatjo xi sinëtangun me. Hacuaha ngajñi rë xcusun vëhë ne, hya casua me corona rë Saúl xi cafahatsja me cojo sa xi má me xuta xi matitjun. Jemu jyë cjuasua caviyuju me nixtin hya.

Jinguyëjë rë xi siutaha cuaha xuta cahndë hiscan xi hmi rë Gilgal jan ne, casua Samuel ngu conseju xi cuijnetaha xa rë me. Titjun casua rë me xuta jan cahndë xi cuichja me sá xi tjin mé xcusun xi ndajintjin casahmi Samuel cojo xuta ngajñi xa rë me. Peru xuta jan ne, cachja me xi Samuel ne, casahmii camaha ni me hisca ngu xcusun chojyihî hane hisca ngu xuta cavindachaain rë me. Xi cavatju vëhë ne, sehe catsinguitsjen rë Samuel xuta jan tsëhë yëjë ni cjuandaja xi casahmi Nina cojo xutachanga rë xuta xi cuacun jan. Hacuaha catsinguitsjen rë me xuta hacutjin cavaxë Nina me tsëhë

Egipto hane casua rē me yējē nangui Canaán. Hacuaha catsinguitsjen rē me xuta jan hacutjin xi jemu cjín ndiya cafaharcun xuta jan nina ndacha, hacuaha cachja me cojo rē me hacutjin xi Nina ne, casua me cahndē xi cacaa rē xuta condra rē me sahmi me si cojo rē me ngatsē rē xi cuatjin cafaharcun me nina ndacha jan. Hacuaha catsinguitsjen sa rē me xuta jan hacutjin xi jima ngu ndiya xi cahndiin me ta cafaharcun me nina ndacha ne, pero sehe cafehya rē me Nina xi cuaxētje rē me, Nina ne, cuatjin casahmi me cjuandaja vĕhĕ. Hacuaha cavuya cachja nga me cojo xuta jan xi catsichajaya me hya xi cuatjin cafehya me ngu xuta xi cumatitjun tsĕhĕ me, peru tsajin rqui rē. Quihndē ne, sá xi me xi matitjun o sá xi xuta ngarca jan ne, meje rē xi ndaja sahmi me cuidadu cojo sa xi cuma cuetaharcun me sacuatjin chja cjua rē ley rē Nina. Hane hya hisca xi meje cajnetaha cjua ne, casua Samuel cjua rē me xi sahmi me oración rē me ngatsē rē yējē xuta jan.

Hya xi camá ne, Saúl, me xi matitjun jan ne, cavaxijin me jyan mil xuta xihin xi cuiyuju cha sacuaha sindadu cojo me hane cojo cha Jonatán, quihndi rē me. Hane yējē sa xihin xi yahnga jan ne, cavuya cafe cha ndava cha.

**Cahndiin Saúl tséhë Nina hane ngatsë rë vëhë ne,
cachja Nina cojo me xi cumajin cjuenduju me sacuaha
me xi matitjun me**

(I Samuel 13:3-15:35)

Hya xi ha jemu cavatju nixtin jan ne, cha Jonatán cojo sindadu xi tjengui rë cha ne, casahmi cha si cojo ngujo sindadu rë xuta filisteo xi siutaha me tjehen rë nangui rë me. Hya xi camá ne, jemu cjin sindadu casahmitangun xuta filisteo xi cjue sahmi me si cojo xuta tjë rë Israel. Hacuaha Saúl ne, casahmitangun me sindadu rë me. Hane ngatsë rë xi meje rë me cjuandaja rë Nina ne, Saúl cojo sindadu rë me ne, quiji me nandya Gilgal ta, ngajan cuiyujuya me hisca xi cjuehe Samuel ta ngajan tsiquehen Samuel ngu jo chu xi sua rë me Nina sacuaha ngu cjuatjo. Samuel ne, cachja me cojo Saúl xi ngajan cuejñaya rë me yatu nixtin. Peru cavechu yatu nixtin jan, hane fiin Samuel. Vëhë xi me xi má sindadu ne, tivetsihin tife me ndava me. Cuatjin camá xi Saúl ne, cafaha suva me cjuacjintacun jan sehe cafaha suva me chu hane catsiquehen me chu casua me cjuatjo cojo Nina. Hane ha sehe tu hitsë cajnetaha casahmi me ne, cafehe Samuel. Hane xi camachaya rë Samuel xcusun xi casahmi

Saúl ne, jemu camaxti rë me. Hane Samuel ne, cachja me cojo Saúl xi ngatsë rë xi cahndiin me ley rë Nina ta cafahatsja me xa rë nahmi handasa hacuiin xuta tjë rë Leví má me, vëhë xi chja Nina xi xa xi satë rë me sacuaha me xi matitjun tsëhë xuta nandya Israel ne, satiin rë quihndi rë me, ta hacjahi nga me satë rë xa jan. Hane xi cavatju cachja Samuel cuatjin ne, sehe cafe me ndava me.



Xi cavetju Saúl tséhë nandya Gilgal ne, quiji caviyujuchjine me cojo sindadu rë me ngajan ndiya nguijña xi cuetsihin me si.

Jinguyëjë rë ne, cha Jonatán, quihndi rë me, cojo ngu sa cha xi sahmi cuidadu espada rë cha ne, quiji cha ngu cahndë hiscan xi siu ngu can cha sindadu rë xuta filisteo xi viyuju cuidadu cha ngu cahunchun xcu tséhë jo naxi. Cha Jonatán ne, cavetahacacun cha xi cuisecoo Nina cha xi cuma tsiquehen cha sindadu jan. Peru meje rë cha xi tsingacun Nina ngu seña cojo sa xi tjin cjuaquixi. Meje rë cha xi sahmi Nina xi sua sindadu filisteo jan cahndë xi cjueniji cha hisca hiscan siu sindadu jan, hane vëhë cuma seña xi chuya rë Nina cjuatacun jan. Hane cuatjin camá. Cha sindadu jan ne, cajindaya cha cha Jonatán cojo xicjin cha xi cjueniji cha hisca hiscan siu sindadu jan. Hane cha Jonatán cojo xicjin cha ne, cuatjin casahmi cha. Hya xi camá ne, Nina ne, cavisecoo me cha Jonatán cojo xicjin cha, hane camá catsiquehen cha sindadu jan. Ngajan xi yëjë sindadu rë xuta filisteo xi yahnga ne, camacjincacun cha, hane cavetsihin cavanga cha quiji nguehe quiji ngajan cha. Hatuxa sacuinyiin rë cha mé xi sahmi cha. Hane xi cavutsejenniji Saúl tséhë hisca hiscan tacun me, hane cavëë me xcusun xi tijima ne, quijicojo me sindadu ladu rë me cojo sa xi hacuaha cojo cha xi cuacun vëhë sahmi cha si

jan. Nixtin hya ne, jemu cavisecoo Nina cha ta jemu cjín sindadu rē xuta filisteo catsiquehen cha.

Nixtin jan ne, cjua vihi cavitexa Saúl, me xi matitjun xcun Nina: “Nixtin quihndē ne, tsajin camaha ni yo ngayin xi xini niñu. Nechin xun hiscan hya xi ha camá xi cajnetaha castigu xi cuma cojo condra naha. Hane sá xi tjin yo xi sinē niñu ne, niquihin”. Cuatjin camá xi yějē sindadu jan ne ta, cahndē cha cjua xi cachja me, yějē ni me ne, cavutaain me hisca ngu hntsua niñu nixtin hya. Handasa jemu vojo rē me, peru cajinii me. Hisca xi cavatju me tiña hiscan quitaha ngu ndava xatē xi jemu hinchá tsjen ne, hiscan ngu me cavatjiincacun me cavutaha me hitsē tsjen jan. Suva ngu ni cha Jonatán xi cahvi cha hitsē ta, tsēhē xi cha vēhē ne, cavatjinxcuuain cha cjua xi cachja nahmi rē cha. Hane cahvi cha hitsē tsjen jan, hacuaha cajinē cha.

Hya xi camá ne, ha nguixun vēhē ni ne, meje cuya Saúl sahmi me si ngu ndiya nga cojo xuta filisteo. Cuatjin camá xi nahmi ne, cavinenguise rē me Nina sa ndatjin o sa xi ndajintjin cuetju sa xi cjue nga Saúl cojo sindadu rē me xcun si jan. Peru Nina ne, cafayaainguiin me. (Cafayaainguiin me ta tsēhē xi cha Jonatán ne,

cajinë cha hitsë tsjen jan.) Ngajan xi yějě ni me cavaxë me ngu suerte sehe cumatsejen yo xi choho casahmi. Hane cavetjucaa xi casatë rë xi cha Jonatán ne, casahmi cha. Saúl jan ne, cavejñacacun me xi tsiquehen me quihndi rë me jan; peru yějě ni xuta tjě rë Israel ne, cachja me ta cha Jonatán ne, ndajintjin xi cueya cha, tsěhě xi cha vėhě tjun tjun cha cavetsihin catsiquehen cha sindadu rë xuta filisteo. Cuitjin camá xi cavetjutje cha Jonatán hane cahmii cha.

Saúl jan ne, jemu camá jyě hnga me. Hacuaha jemu tjin ngahñucjua rë me ta, jemu cjin sindadu casahmitangun me xi casahmi me si cojo yějě xuta condra rë xuta nangui Israel. Pero handasa xi jemu tjin ngahñucjua rë me, camajin cajnetaha camahani cjuacjintacun xi tjin cojo xuta filisteo.

Hane xi cavatju sa nixtin jan ne, sehe cachja Samuel cojo Saúl cuitjin:

—Nina ne, meje rë me xi nihñi si cojo xuta amalecita hane niquihin me cojo yějě chu rë me ta, suva Nina cachja me xi meje rë xi cueya yějě xuta xi cuacun vë cojo yějě chu rë me.

Cuatjin cumá rë xuta jan xi cuma castigu me tsëhë xi casahmi me si cojo xuta tjë rë Israel hya xi canduva me ndiya xi cavetju me tsëhë Egipto xi cjue me Canaán. Hya xi camá cavihndë Saúl cjua jan, jemu cjín sindadu casahmitangun me sehe quiji casahmi me si cojo xuta amalecita. Casahmi me xi cajnecacun yëjë xuta jan sehe catsiquehen me yëjë ni me. Peru choho casahmi Saúl ta me xi matitjun rë xuta jan ne, catsiquiin me me, tu catsihñu me me quijicojo me me. Hacuaha xuta tjë rë Israel jan ne, cafaha quicun me chu xi jemu ndacun tsëhë xuta jan, hane suva ni chu xi yiin ndacun ne, chu vëhë xi catsiquehen me chu.

Samuel ne, xin quitaha me. Hya xi camá ne, cachja Nina cojo Samuel xi cahndiin Saúl tsëhë Nina. Vëhë xi hisca choho sa má rë Nina xi cuatjin cachja me xi Saúl camatitjun me. Sehe Samuel ne, quiji cavanguise me Saúl. Hane xi casacu rë me Saúl ngajan Gilgal ne, suva Saúl cachja me titjun cuitjin:

- Casahme sacuatjin cachja Nina xi meje rë me xi sahme.
- Cuatjin cachja me.

Pero Samuel ne, cuitjin cafayangui me:

—Sa xi quixi nújun, ¿Hacutjin cumá xi nuhya rē cjua tsēhē chu tsangá cojo cjua tsēhē chu ndyaja?



Hane Saúl ne, cuitjin cachja nga me:

—¡Hajin! Chu xi nuhya rē jan ne, chu xi canaxijin chu ta ndacun chu. Vēhē xi tihin rē Nina sacuaha ngu cjuatjo, pero yahnga chu ne, caniquihin chu. —Cuatjin cachja Saúl.

Ngajan xi Samuel ne, cuitjin cafayangui me:

—Ha joho, peru nguchjin camá cachja Nina cojo ná xi ngaye ne, ha quihndê cumajin cuihinduju xi matitjun ngaye, tsêhê xi canihñii sacuatjin xi cavitexa me ngaye. Nina ne, cachja me cojo ri xi niquihin yějê xuta hacuaha niquihin yějê chu rë me. Peru ngaye ne, tu cachjehe tsêhê xi siucuaha.

Hane Saúl ne, cuitjin cachja me:

—¡Ngahan ne, cahndê tsêhê Nina ngahan! Cějê casahme si cojo xuta amalecita sacuaha cachja me, catsiquehen yějê xuta, hacuaha catsihñu me xi matitjun rë me quějêcojo me. Xuta ladu naha ne, me vêhê xi canduvacojo me ngujo chu xi tsejen xi cuma tihin rë Nina sacuaha ngu cjuatjo. —Cuatjin cachja me.

Hane Samuel ne, cuitjin cafayangui me tsêhê:

—Tsajin mé sa xi venguichji rë ta, xi hitsê sa meje rë Nina ne, meje rë me xi cuinohye tsêhê me ta, vêhê xi hitsê sa sahmi ngujoyê xi cuma rë tsêhê xi tahan rë me ngu cjuatjo. Xcusun xi hitsê sa sahmi ngujoyê xi nihña ne, nihña sacuatjin xi vitexa Nina. Xi má rë Nina ne, tangun ni choho fi: há sá xi nihñii sacuatjin meje rë Nina xi

nihñi, há sa xi nihñi ngu cjuasurqui o há sá xi chjehercuin nina ndacha. Vëhë xi Nina ne, suaain me cahndë xi cjuenduju xi matitjun ngaye, tsëhë xi canihñii sacuatjin cavitexa me ngaye. —Cuatjin cachja Samuel.

Hya xi cahndë Saúl cjua vëhë ne, catsacjun me, hane cavangui me chuva rë hacutjin xi cjuinjecacun Samuel, cojo sa xi tsinchataha rë me. Peru cachja Samuel cojo rë me ta Nina ne, tsindeyaain me cjuatacun rë me sacuatjin sahmi xuta. Hisca hacuiin cuma ngu cuma jo tacun hane hatuxa cuaxijin Nina jingu sa xihin xi cumatitjun. Hane xi cavatju cjua jan, casahmi Samuel sacuaha cachja Nina ta catsiquehen me xuta xi matitjun tsëhë xuta amalecita jan, sehe cafe me ndava me. Saúl ne, hacuaha cafe me ndava me. Hya cavuyaain cavëë xicjin sa me. Peru handasa xi cavuyaain cavëë xicjin me ne, Samuel ne, jemu choho má rë me tsëhë xi cachja Nina xi Saúl ne, cumajin cjuenduju xi cumatitjun me.

**Casuaxa Nina David xi cuma me xuta matitjun tsëhë
xuta tjë rë Israel**

(I Samuel 16:1-13)

Ngu nixtin hya xi cavatju xcusun vëhë ne, cachja Nina cojo Samuel xi ha quihndë yiin cumavacacun me tsëhë xcusun xi cavatju Saúl me xi matitjun jan. Cachja Nina xi catji catitejnu Samuel aceite rcu jingu sa xihin cojo sa xi cumatsejen xi me vëhë má me ngu xatsë xuta xi matitjun. Cavitexa me Samuel xi cjue me ngajan nandya Belén ta ngajan cuitejnu me hitsë aceite rcu ngu cha quihndi rë Isaí, ngu cha tsëhë ndihya tjë rë Judá. Cuatjin camá xi Samuel ne, quiji me cahndë vëhë. Hane ngajan cavëë me ngu cha hnga xi hacuaha jemu ndajyihi cha, cha xi má quihndi tjun rë Isaí. Hane ngutjen tjin rë me cjuaquixi xi hacuiin ngu hacuiin jo cumacacun me ta hacui cha vëhë xi satë rë xi cuitejnu me aceite rcu cha. Cuatjin camacacun me. Peru Nina ne, cuitjin cachja me cojo rë me:

—Jeya, hacuiin cha. Handasa hnga cha, handasa jemu ndajyihi cha, peru hacuiin cha vëhë. Ngayun xi xuta má yun, chutsujun sacuatjin jyihi ngu xuta taha xcun ni yojo rë me, peru ngahan ne, ma

vutsejen hisca xahasen rē xuta; hane vĕhĕ chuva rē xi vejñácacun xcusun xi sahme. —Cuatjin cachja Nina.

Ngajan xi Isaí ne, cajindaya me quihndi rē me chuva ngu chuva ngu. Peru xi cafehe jimangu me ne, Nina ne, cachja me cojo Samuel ta hacuiin hisca ngu cha xi cuacun vĕhĕ xi suaxa Nina cha. Ngajan xi Samuel ne, cavinenguisse rē me Isaí sá xi ha quihndĕ tsajin sa rē me quihndi. Hane Isaí ne, cachja me xi tjin sa rē me ngu quihndi, quihndi ngascan xi hmi rē David. Pero cha vĕ jan ne, vejña cha nguijña ta tisahmi cuidadu rē cha chu tsángá. Hane Samuel ne, cachja me cojo Isaí xi tsingatju me cjuechjaha rē cha. Sehe cafehe David, hane cachja Nina cojo Samuel cuitjin:

—Cha vihi xi meje ná. Titejni aceite rcu cha. —Cuatjin cachja Nina.

Ngajan xi Samuel ne, cavitejnu me aceite rcu David. Hora hya ne, hinchacun yĕjĕ ni hntsĕ cha hane cavutsejen rē me xi cuatjin casahmi Samuel. David jan ne, ngu cha xi jemu ndajyihi, hacuaha jemu chuya rē xuta tsĕhĕ cha, hacuaha tsejen xi jemu quicuncacun cha. Hya xi camá ne, sehe cavuya cafe David ndava cha, peru

Hasen rē Nina ne, caviyuju xcun cha. Hacuaha Samuel ne, cavuya
cafe me ndava me.



